

## 1 XOÃO

### Merepanika Xoão Iokanatsopatakiti

#### *Xesosi “Teoso Sãkire” Inakori*

<sup>1</sup> Nota iõkatsopata hite ìkapani, iua “Teoso sãkire” inakori asãpiretini ìkapani. Ìtipirika auakari itxaua. Itxìkitakari ikinipoko auãki inini. Itixi kamiko apisa iua aua. Atera kenakotari isãkire. Aõkiã ate atamatari iua. Auakoã amaãtakari iua. Ininiã atãopitika ate imarotari iua. <sup>2</sup> Iua ikinipoko auãki inìkitaãkari. Iuaka oerekaua atemoni. Ate imarotapekari iua, ininiã asãpiretai aãtamatakiti, akenakotakiti pakini. Ate sãpiretai hite iua ãtipirika auakari, kãkiti auãki inìkitaãkari, ininiã kãkiti auapikako Teosokata. Iua Xesosi Kristo inaãka akiritiko. Iua aua irikata, Teosokata. Iuaka oerekaua atemoni. Aãtamatarari iito. <sup>3</sup> Ate sãpiretai hite aãtamatakiti, akenakotakiti pakini, amoianatakiniua ìkapani. Atão nisãpiretai. Amoianatakakaua Teosokata, Xesosi Kristo pakinikata. <sup>4</sup> Ia sãkiretxiti aiokanata hitemoni, iteene hìpoxokoniuatini ìkapani.

#### *Teoso Pokamara Atoko Itxa*

<sup>5</sup> Teoso pokamara atoko itxa, kotxi maerekati !ikama. Ipiã !auari Teoso auiniãtaã, kotxi maerekati !ikama. Ikara iokanapirena imi sãpiretaua ate. Ininiã ate sãpiretai hite. <sup>6</sup> Maerekati akamakasaaki, ipiã auakani atoko atxa. Iuasaaki, “Teoso amoianata,” aniniã, paxirari asãkire. Kona atão akamakiti iuasaaki. <sup>7</sup> Teoso aua ikamaraã, kotxi erekarinoka ikama. Ate ikamaraã aãuiniã Teoso atoko aniniã, erekarinoka akaminiã, ininiã ate Teoso sãkire auiaãkani moianariakori atxaua, ininiã amoianatakakaua. Ikamaraã aãuiniã, Teoso arokaua Xesosi arëkaã. Imakatzakari ikinika maerekati akamakiti, kotxi imi Xesosi Kristo

ipina ate ikapani. Iarēka xikepoakata ate maerekani imaktxakini ikapani.

<sup>8</sup> “Na nota kamari maerekati,” aniniã, ateka misiriene-taua. Ikara atoko aniniã, ate !imarotari atão Teoso sãkire aãkixinireẽ. <sup>9</sup> Amaerekani Teosomoni asãpiretiniã, iua makatxakapitikari amaerekani. Oeretari ate ãkixinire. Imaktxakari ikinipoko amaerekani. Ikamari ikara atoko, kotxi imaktxakaenetari amaerekani. Ikamapitikari ikamaenetakiti. Ikamapikari atão. <sup>10</sup> “Uatxapiima maerekati !nikama,” pininiã, pitemoni Teoso sãkire paxirari atx-iiti? Kotxi Teoso txapekari kãkiti: “Maerekati kamakari kãkiti.” “Maerekati !nikama,” pininiã, !pimarotari Teoso sãkire pãkixinireẽ. !Pikamari Teoso sãkire iaõka iusaaki.

## 2

### *Kãkiti Teoso Atão Imarotakari*

<sup>1</sup> Namariteni nota tirketakini atoko hĩtxaua hĩte. Ikara niõkatsopata, maerekati himakamakani ikapani. Maerekati akamakasaaki, masãpiretari Xesosi Kristo. Aĩri Teoso misãkiretakari itxaua Xesosi. Atão inakarinoka kamakari itxaua iua. Iua misãkiretari Teoso ate ikapani, amaerekani imaktxakini ikapani. <sup>2</sup> Iua makatxakari maerekati akamakiti. Kona ate maerekaninanini imaktxaka. Ipina ikini itixiti auakani maerekani imaktxakini ikapani.

<sup>3</sup> Teoso paniãtakiti akĩpitiniã, atão aimarotari Teoso. <sup>4</sup> Teoso paniãtakiti makĩpitakati, “Nota imarotari Teoso,” inakari, paxirari isãkire. ãkixinireẽ !imarotari atão inakari Teoso sãkire. <sup>5</sup> Teoso sãkire kĩpitakari iteene tirketari Teoso. Kininiãpa aimarotari iua nakiti aniniãua? <sup>6</sup> Akamakiti ikiniõtika Xesosi kamakiti atokokana akaminiã, iusaaki aimarotari Teoso nakiti aniniãua. “Teoso nakiti nitxaua,” pininiã, pikamariko Xesosi kamakiti atokokana.

*Iteene Matiretakakaua*

<sup>7</sup> Nitiretakini, Apiananiri paniãtaua atiretakakiniua. Ia paniãtxi niõkatsopatakiti hĩtemoni, kona amaneriikani. Hĩkenakopiretapekari ikara paniãtxi merepitipanika Xesosi sãkire hĩkenakotakasaaki. Iuasaaki hĩkenakotari ikara paniãtxi hĩtiretakakiniua tĩkane. Ikara paniãtxi kitxakapirĩkari itxaua. Hĩkenakotapekari ikara paniãtxi. <sup>8</sup> Iuaritika ikara paniãtxi amaneri itxaua. Xesosi kĩpitari ikara paniãtxi, kotxi itiretari kãkiti. Hĩte apaka tiretari kãkiti, ininiã aimarotari ikara paniãtxi ereka inini. Ininiã ipiã napaãpota, kotxi kãkiti imaroãpotari atão Teoso sãkire. Atão inakari kãkiti imarotakasaaki, pokamarari atoko itxa kãkiti ãkixinireẽ.

<sup>9</sup> “Pokamara naua,” pininiã, txamari iuasaaki pomanatari pitari Xesosi sãkire auiãkari, ikara atoko pininiã, uatxapiima ipiãã pauapanika. <sup>10</sup> Pitari Xesosi auiãkari pitiretiniã, pokamara pauapitika. Ininiã erekari pãkixinire, ininiãkara pãkixinireẽ auakari kona txĩkitakai maerekati pikamini. <sup>11</sup> Pitari Xesosi sãkire auiãkari pomanatiniã, ipiãã auakari atoko pitxaua. Iuasaaki pitĩpokotapika ipiãã. !Pimarotari pisinimoni. Mõsiãreti atoko pitxaua, kotxi !apakata patamarauatini ipiã xika.

<sup>12</sup> Namariteni nota tiretakini, niõkatsopata hĩte ĩkapani, kotxi Xesosi makatxakapekari himaerekani, kotxi kãkiti maerekani makatxakakari itxaua.

<sup>13</sup> Hĩte irĩtxiakoripekana, niõkatsopata hĩte ĩkapani, kotxi hĩte iteene imarotari Xesosi, itixi kamikosaaki auapeka inakari.

Hĩte ãtokoriakoripekana, niõkatsopata hĩte ĩkapani, kotxi homitikapekari Satanasi hĩtapararitika.

Namaritenipekana, niõkatsopata hĩte ĩkapani, kotxi himarotari aĩri Teoso.

<sup>14</sup> Hïte irïtxiakoripekana, niökatsopata hïte ïkapani, kotxi himarotari Xesosi. Itixi kamikosaaki auakaripeka itxaua.

Hïte âtokoriakoripekana, niökatsopata hïte ïkapani, kotxi pataparari hâkixinire. Teoso sâkire auapika hâkixinireë. Homitikapekari Satanasi hïtapararitika.

### *Hïnirekapiri Itixi Auakani Nireëkiti*

<sup>15</sup> Itixi auakani nireëkiti atoko inakari !hinirekape, kotxi ninoa nirekari maerekati ikaminina. Hïtiretiniâri ninoa kamakiti, !hïtiretari âiri Teoso. <sup>16</sup> Maerekati kâkiti kamakiti ia atoko itxapaniko: Inirekarina maerekati iïtona nireëkiti ikaminina. Inirekarina maerekati okina nireëkiti ikaminina. Iuikauana, katii ininiâuana. Iuikarina ikamakitina. Ikara maerekati kâkiti kamakiti potorika ïkorapokoriti. Kona Teosomonikirini ikara. <sup>17</sup> Itixi xipokako. Ikinipoko tiitxi kâkiti nireëkiti apaka xipokako. Kâkiti Teoso nireëkiti kamakarirako !ixipoka. Auapinini-ika Teosokata.

### *Kristo Omanatakani*

<sup>18</sup> Namariteni nota tiretakini, itixi xipokini ôti katananapanoka apoka. Kristo omanatakani auïte apokako itixi xipokini ôti apisa. Ikara himarotapeka. Uatxa Kristo omanatakani itomane apokapeka. Ikara atoko ininiâ, aimarotari itixi xipokini ôti takotepeka inini. <sup>19</sup> Ninoa Kristo omanatakani, mitxi atekata apotiitaua, Teosokata aâpotiitakasaakiua. Txamari ninoa !auikari Xesosi sâkire ate auikiniri atokokana, ininiâ ninoa sipe. Ninoa atâo Xesosi sâkire auikaâkamako, atekata ikaikotapikamanako. Itakanapaua, kotxi ate auikari Xesosi sâkire. Ninoa !auikari.

<sup>20</sup> Teoso, erekarinoka kamakari, sikapekai hïte Erekarî Matamatakoti himoianari tïkane. Ininiâ hïte imarotari atâo inakari Xesosi sâkire. <sup>21</sup> Hïte imarotari atâo inakari

Xesosi sãkire, iuaritika niõkatsopata hĩtemoni. Niokanatsopata hĩtemoni, kotxi himarotari atão inakari. Paxiene kamakari limarotari atão inakari sãkiretxiti.

<sup>22</sup> Natokopa itxa iua paxiene kamakari? Paxiene kamakari txari: “Xesosi kona Teoso mereẽkitini.” Kãkiti ikara atoko inakari Kristo omanatakari itxaua iua. Iua !inirekari aĩri Teoso. Imi apaka !inireka. <sup>23</sup> “Xesosi kona Teoso ãkirini” inakari, na kaikota Teosokata. “Teoso ãkiripitikara Xesosi” inakarirako kaikotapitikako Teosokata.

<sup>24</sup> Hãuiritariko merepitipanika Xesosi sãkire hĩkenakotakiti kaikotini hãkixinireẽ. Ikara kaikotiniã hãkixinireẽ, Teoso ãkirikata hĩkaikotapikako. Aĩri Teosokata hĩkaikota apaka. <sup>25</sup> Xesosi sikaenetapekaua aãuapininiika anini Teosokata.

<sup>26</sup> Niõkatsopata hĩte nõtãkikini ĩkapani, kotxi aua kãkiti Xesosi hĩtakanapini nireẽkani. <sup>27</sup> Erekari Matamatakoti, Xesosi sikakiti, auapanika hĩte ãkixinireẽ, ininiã hĩte na nirekari ãti koerekareri. Iua Erekari Matamatakoti oerekai ĩkinipoko. Iua oerekakiti atãopitika. Kona paxieneni iua. Ininiã hĩkaikotako Xesosikata, Erekari Matamatakoti oereẽkiti hĩkĩpitini.

<sup>28</sup> Ininiã namariteni nota tiretakini, himoianatapikariko Xesosi. Ininiã uaimoni ikanapiriãkasaaki, hĩpĩkarauatini ! auari. Ininiã na hĩpẽtauata haõkitakasaakiri iua. <sup>29</sup> Xesosi kamari atão inakarinoka. Ikara himarotapeka. Ininiãkara himarotari, kãkiti atão inakarinoka kamakani Xesosi anaakori ininiuana.

### 3

#### *Teoso Anaakori*

<sup>1</sup> Aĩri Teoso iteene tiretaua ate. Hĩxinikariko iua tiraõki. Iua iteene tiretaua ate, ininiã, “Namariteni,” itxaua ate. Ari, atãopitikara Teoso anaakori atxaua. Ninoa Teoso anaakori minakaniuua ! auikari Teoso anaakori aniniuua, kotxi ninoa !imarotari Teoso. <sup>2</sup> Nitiretakini, Teoso

anaakori atxapekaua uatxa. Eereka !aimarotari kana-tokoako atxapaniko. Ia aimarotapitika. Xesosi kanapiri-ia-kasaaki, Xesosi atoko atxapekauako, kotxi iusaaki aã-tamatariko iua. <sup>3</sup> Kãkiti ikara auiãkani, !inirekarina maerekati ikaminina, kotxi Xesosi likamari maerekati.

<sup>4</sup> Maerekati kamakari ! ikamari Teoso paniãtakiti. Amakamakanisaakiri Teoso paniãtakiti, iusaakipeka akamari maerekati. <sup>5</sup> Himarotari Xesosi apokapeka ïkorapokoriti maerekati akamakiti imaktxakini ïkapani. Xesosi ! ikamari maerekati. <sup>6</sup> Kãkiti Xesosi ãtipirika moianatakari ! inirekaikari maerekati ikamini. Iua ãtipirika maerekati kamakari ! aõkitapanikari Xesosi. ! Imarotapanikari Xesosi.

<sup>7</sup> Namariteni nota tiretakini, ! hãuiritapiri apanakini misirienetini hite. Atão inakaranoka kamakari kamapitikari Teoso nireëkitinoka, Xesosi kaminiri atokokana, kotxi Xesosi kamari atão inakaranoka. <sup>8</sup> ãtipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaa-kipekara ikamaãpokatapitiporiri maerekati. Uatxa ikamapanikari. Teoso ãkiri apoka ïkorapokoriti maerekati Satanasi parïka ixipokini ïkapani.

<sup>9</sup> Teoso anaakori ! inirekaikari maerekati ikaminina, kotxi Teoso aua ãkixinireëna. Ininiã ! iposotarina maerekati ikamaãpotinina, kotxi iritarina Teoso. <sup>10</sup> Ininiã kipa Teoso anaakori txataua? Atão inakaranoka kamakanira Teoso anaakori txaua. ãti tirketakanira Teoso anaakori txaua. Ininiã kipa Satanasi anaakori txataua? Erekarî makamakanira Satanasi anaakori txaua. ãti matirketakanira Satanasi anaakori txaua.

### *Kãkiti Tirketakiniua Pirena*

<sup>11</sup> Matirketakaua. Merepitipanika Xesosi sãkire hïkenakotakasaaki, hïkenakotari ikara õtãkiprenatxi, hïtirketakiniua. <sup>12</sup> Kaiï inakori atoko ! hïtxape. Maerekatinoka

kamakari nakiti itxaua iua Kaiĩ. Satanasi nakiti itxaua. Kaiĩ okari atão itarika. Kixikapa okari? Ixikotiniri xika okapiri, kotxi itari kamari erekarinoka. Kaiĩ kamari maerekatinoka.

<sup>13</sup> Nitariakori, Xesosi sãkire mauĩãkani omanatakasaakii hĩte, !hĩtsorĩkaãtapeko. “Kixikapa ninoa omanataua ate?” !hĩtxapeko, kotxi ikara atoko inakari apokapitikako. <sup>14</sup> Atiretiniãri aĩtariakori Xesosi sãkire auĩãkani, aimarotari !apinaika. Aãuapininiika Teosokata. Matiraõkiti ãkixinire ipĩkari atoko itxa. <sup>15</sup> Kãkiti itari omanatakari, Xesosi sãkire auĩãkari omanatakari, kokaniri atoko itxaua. Himarotari kokaniri lauari ãtipirika Teosokata.

<sup>16</sup> Xesosi Kristo ipina amaerekani imakatzakini ĩkapani, ãtipirika Teosokata aãuini ĩkapani. Ikara oerekaua atão tiraõkitxi. Ininiã erekari aĩtariakori atiretini. Xesosi tiretiniua ate atokokana, erekari atiretiniri aĩtariakori. Atxiĩti apina aĩtari mapinakani ĩkapani. <sup>17</sup> Pitii, pikiena pakini auiniã, pitari, Teoso sãkire auĩãkari tii, ikiena pakini mauakaniã, pisikariko iuamoni. Pimasikakaniãri iuamoni, Teoso tiraõki pãkixinireẽ !auari. <sup>18</sup> Namariteni nota tiretakini, “Apanakini ate tireta,” atxaua, txamari kaamoni inakasaakina na asikana minakati, ininiã na atão atiretana. Atão matiretana apanakini. Kaamoni inakasaakina, masikana ninoa amonitakitina.

### *Teoso Sãkire Kĩpitakari*

<sup>19</sup> Ikara atoko akaminiã, aimarotari Teoso anaakori aniniãua. Aimarotari atão inakari sãkiretxiti akĩpitini. Ikara atoko akaminiã, erekapitikari aãkixinire. Ikara atoko akaminiã, !apĩkari Teoso amisãkiretini. <sup>20</sup> “Kona erekano,” pininiã pãkixinireẽ, mitxi pimaerekani pikamini xika, !pipĩkarauatape, kotxi Teoso iteene imarotai, iuaritika iteene iamoniãkai. Poiãoka aimarotari aãkixinireẽ auakari. Teoso imarotari ikinipoko.

<sup>21</sup> Nitiretakini, pãkixinireẽ: “Namanaãpekari Teoso imakinika nimaerekani imakatzakini,” pininiã, kata-paraxinirepitikai Teoso pimisãkiretini. <sup>22</sup> Ininiã iua sikaua aamanaãkiti, kotxi ate kamari ipaniãtakiti iaõka. Iua apokaerekatakitinoka akama. <sup>23</sup> Teoso paniãtaua ate: “Hãuikariko namarite Xesosi Kristo sãkire.” Apaka Teoso paniãtaua: “Hĩtiretakakauako.” Teoso paniãtaua ikara akamini. <sup>24</sup> Teoso sãkire iaõka kamakari kaikotapika Teosokata ãtipirika. Teoso kaikotapika iuakata ãtipirika apaka. Aimarotari Teoso kaikotini atekata, kotxi iua sikaua Erekaru Matamatakoti aãkixinireẽ auini ikapani.

## 4

### *Atamakaerekarauatini*

<sup>1</sup> Nitiretakini, !hãuikapiri ikinimane kãkiti sãkire, “Erekari Matamatakoti aua nota ãkixinireẽ,” inakani. Hã-taerekatanako ninoa. Atão Erekaru Matamatakoti auatana atxiĩti ãkixinireẽna? Atxiĩti matamatakoti ãkixinireẽna auakari kona Teosomoni ikarini. Itomaneri kãkiti, “Nota Teoso sãkire sãpiretakarino,” inakani, txamari na atão ninoa sãkire. Kãkiti ninoa atoko inakani aua ikini itixitika. !Isãpiretarina atão Teoso sãkire. Imisirienetarina kãkiti. <sup>2</sup> Kãkiti sãpiretiniãua: “Teoso ãkiri Xesosi Kristo apokapeka ikorapokoriti. Kãkitipeka itxaua,” ininiã iuasaaki aimarotari Erekaru Matamatakoti auapitika iua ãkixinireẽ. Ikara atoko aimarotari Erekaru Matamatakoti Teoso sikakiti auãtotiniri kãkiti. <sup>3</sup> Kãkiti sãpiretiniãua: “Xesosi na atão kãkiti !itxaua,” ininiã iuasaaki aimarotari Erekaru Matamatakoti !auari iua kãkiti ãkixinireẽ. Matamatakoti iua kãkiti ãkixinireẽ auakari Satanasi nakiti itxaua. Kristo omanatakari nakiti itxaua. Iua Erekaru Matamatakoti Teoso nakiti itxaua. Hikenakopiretapekari: “Maerekati Matamatakoti Kristo omanatakari iokanatakiti apokapitikako ikorapokoriti,” itxa. Uatxa apokapeka.



<sup>4</sup> Hïte namariteni, Teoso nakitiakori hïtxaua. Ininiã hïte ! auikari atão minakati sãpiretakani sãpiretakiti, kotxi Erekarî Matamatakoti hïte ãkixinireẽ auakari apia posotiireri itxaua iua. Maerekati matamatakoti, Xesosi sãkire mauïãkani ãkixinireẽ auakari, kaposotiireri itxaua, iuaritika Erekarî Matamatakoti hïte ãkixinireẽ auakari apia sikaimaroretai hïte. <sup>5</sup> Ninoa atão minakati sãpiretakani xinikakiti, itixi auakani xinikakiti atokotxikana, ininiãkara itixi auakani auikari ninoa sãkire. <sup>6</sup> Atepekana, Teoso nakitiakori atxaua. Teoso imarotakari auikari asãkire. Teoso nakiti minakatiua ! auikari asãkire. Ininiãkara aimarotari kãkiti Erekarî Matamatakoti auaãkixiniretakini. Iua Erekarî Matamatakoti atãonoka isãkîrauata. Aimarotari kãkiti ãti matamatakoti auaãkixiniretakini. Iua ãti matamatakoti kamisirienereri itxaua.

### *Teoso Tiraõki*

<sup>7</sup> Nitiretakini, matiretakakaua, kotxi tiraõkitxi Teosomoni potorikakari itxaua. Katiraõkirini Teoso anaakori itxauana. Ninoa atão imarotari Teoso. <sup>8</sup> Matiraõkiti ! imarotari Teoso, kotxi Teoso tiraõkiuatapika. Tiraõkitxi Teosomoni potoriãkari itxaua. <sup>9</sup> Teoso iokanatarî imatonõkari imi atemoni, Teosokata ãtipirika aãuini ïkapani. Ikara atoko ininiã, Teoso oerekaua itiretiniua. <sup>10</sup> Ikara tiraõkitxi atão inakari itxaua. Mitxi ate !atiretari Teoso. Iuaritika iua tiretaua ate, ininiã iokanatarî imi atemoni ipinini ïkapani, maerekati akamakiti imakatzakini ïkapani.

<sup>11</sup> Nitiretakini, ikara atokorako itxa Teoso tiretiniua, ininiã matiretakakaua. <sup>12</sup> !Auari Teoso atamatakari, iuaritika Teoso auari aãkixinireẽ, atiretakakiniãua. Ininiã Teoso oerekaua atão atiraõkiuatini.

<sup>13</sup> Aimarotari Teosokata akaikotini ãtipirika. Aimarotari Teoso ãtipirika kaikotini atekata. Aimarotari ikara atoko inakari, kotxi iua sikari Erekarî Matamatakoti atemoni. <sup>14</sup> Aãtamapekari Xesosi kamakiti. Akenakotapekari isãpiretakiti. Ininiã asãpiretari ikinimane, aïri

Teoso iokanatari imi kãkitimoni, amaerekani makatx-akakari ininiua ïkapani, kãkiti ãtipirika Teosokata auini ïkapani. <sup>15</sup> “Xesosi Teoso ãkiripitikara,” ina sãkiretakani, Teoso kaikotapika ninoakata. Apaka ninoa kaikota Teosokata ãtipirika. <sup>16</sup> Aimarotari Teoso tiretiniua. Aãuikapiretapitikari Teoso tiretiniua.

Teoso tiraõkiuatapika. Kãkiti katiraõkiri kaikota Teosokata ãtipirika. Teoso kaikota ãtipirika iuakata apaka. <sup>17</sup> Teoso oerekepekaua atão atiraõkiuatini iua tiraõkiuatini atokokana. Ininiã kataparaxinireua Kristo apisatoõ aãpokasaaki, kãkiti misiritiko õtisaaki. Aimarotari ! imisiritaua iusaaki, ininiã kataparaxinireuako, kotxi ïkorapokoriti aãuakasaaki Kristo atoko atxaua. <sup>18</sup> Atiraõkiuatakasaaki, ! apïkarauata. Atão atiraõkiuatiniã, !uari apïkare. Apïkarauatakasaaki, amaãkaua.

<sup>19</sup> Atiretari Teoso, kotxi mitxipeka iua tiretaua ate. <sup>20</sup> Iua itari omanatakari, “Nota tiretari Teoso” ina sãkiretakari, paxirari isãkire. !Itiretari itari iuakata auakari. Ininiã !iposotari itiretiniri Teoso imaõkitakiniti. <sup>21</sup> Ininiã Teoso paniãtaua: “Teoso tiretakari tiretariko itari apaka.”

## 5

### *Teoso ãkiri Auikiko*

<sup>1</sup> Xesosi Teoso mereëkiti itxaua. Ikara auiaãkani Teoso anaakori itxauana. Aïri Teoso atiretiniã, aïtariakori apaka atireta, kotxi Teoso anaakori ninoa apaka txaua. <sup>2</sup> Teoso atiretiniã, inireëkiti iaõka akaminiã, aimarotari Teoso anaakori apaka atiretini. <sup>3</sup> Teoso atiretiniã, akïpitari ipaniãtakiti. Aposotari akaminiri ipaniãtakiti, kotxi na kamimari ipaniãtakiti. <sup>4</sup> Aposotari akaminiri iua paniãtakiti, kotxi iua anaakori atxapekaua, ininiã isikataparataua, maerekati itixi auakani nireëkiti amakamakani ïkapani. Kininiãpa isikataparataua maerekati ninoa nireëkiti amakamakani ïkapani? Isikataparataua,

kotxi Xesosi sãkire aũuka. <sup>5</sup> Kipa posotari maerekati itixi auakani nireẽkiti imakamakani? Kãkiti auikiniãri Xesosi Teoso ãkiri ininiãua, iuanokara posotari maerekati imakamakani.

<sup>6</sup> Xesosi Kristo Teoso ãkiri itxaua. Teoso oerekapekaua Xesosi iua ãkiri ininiãua. Kãuaãriã Xesosi patxisatikosaaki isãpiretaua. Iuaĩkana Teoso sãpiretaua Xesosi iua ãkiri ininiãua, Xesosi ipĩkasaaki iarẽka ixikepoatakasaaki. Teoso sãpiretaua kona Xesosi patxisatikosaakinanini. Iua oerekaua Xesosi Teoso ãkiri ininiãua ipĩkasaaki apaka. Erekarĩ Matamatakoti sãpiretaua Xesosi Teoso ãkiri ininiãua. Iua atãonoka isãkire. <sup>7</sup> Teoso tixini auakani ipi, ãti pakini oerekaua Xesosi Teoso ãkiri ininiãua, aĩri Teosoma, “Teoso Sãkire” inakorima, Erekarĩ Matamatakotima pakini. Naia ipi, ãti pakini ãtinoka. <sup>8</sup> Īkorapokoriti auakani ipi, ãti pakini, Erekarĩ Matamatakotima, Xesosi patxisatikoma, Xesosi ipininima pakini oerekaua Teoso ãkiri ininiãua Xesosi. <sup>9</sup> Kãkiti erekarini sãpiretakiti aũikapitika, ininiã apiata maũuikari Teoso sãpiretakiti, kotxi atãonoka isãkire. Iuara sãpiretaua Xesosi iua ãkiri ininiãua. <sup>10</sup> Teoso ãkiri auĩãkari ãkixinire imarotari ikara Teoso sãpiretakiti atão inini. Teoso sãpiretakiti mauĩãkati txari: “Paxirari Teoso sãkire,” kotxi !auikari Teoso sãpiretakiti Xesosi iua ãkiri ininiua. <sup>11</sup> Kiripa Teoso sãpiretaua? Iua sãpiretaua: “Nitxĩkitakai auãki hinini notakata hãuapininiika hinini tĩkane. Ikara atoko nitxĩkitakai namarite nakitiakori hinakasaakiaua.” <sup>12</sup> Iua Teoso ãkiri nakiti Teosokata ãtipirika auako. Iua Teoso ãkiri nakiti minakatiua, !auapani ãtipirika Teosokata.

### *Aũuini ãtipirika Anini Tikane*

<sup>13</sup> Hĩte auikari Xesosi Teoso ãkiri ininiua. Niokanatsopata hĩtemoni, Teosokata ãtipirika hãuini himarotini ĩkapani. <sup>14</sup> Teoso nireẽkiti atokotxikana aamanainiãri

Teoso, aimarotari ikenakotari amisãkiretiniri, ininiã kat-aparaxinirepitikaua amisãkiretiniri, kotxi aimarotari iua apakapapiretapitikaua. <sup>15</sup> Ikara atoko aniniã, aimarotari ikenakotari aamanaãkiti, ininiã isikapitikaua.

<sup>16</sup> Himarotakasaakiri pitari kaminiri maerekati, himisãkiretari Teoso iua ïkapani. Ininiã Teoso makatxakari maerekati ikamakiti. Teoso kamari iua âtipirika iuakata auini ïkapani. Ikara maerekati makatxakiko auapitika, ininiã kona itxïkitakari iua xinire ipinini. Âtiã maerekati kãkiti kamakiti aua. Ikara maerekati makatxakiko !auari, ininiã itxïkitakari kãkiti xinire ipinini. Nota !õtãkikai himisãkiretiniri Teoso ikara atoko inakari maerekati kamakari ïkapani.

<sup>17</sup> Teoso paniãtakiti amakamakaniã, iua maerekati txaua. Iuaritika aamanainiãri Xesosi ikara maerekati imakatxakini, ininiã ikara maerekati !itxïkitakari kãkiti xinire ipinini.

<sup>18</sup> Teoso anaakori atão inakani !inirekaikari maerekati ikaminina. Aimarotari ikara. !Inirekaikarina maerekati ikaminina, kotxi Teoso ãkiri nïkatana ninoa. Ininiã maerekati auïte Satanasi !iposotari imisiritinina.

<sup>19</sup> Ikini itixiti auakani auïte itxaua Satanasi, maerekati kamakari. Iuaritika aimarotari Teoso anaakori aniniua ate.

<sup>20</sup> Aimarotari, Teoso ãkiri apokapeka ïkorapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itxïkitakaua iuakata âtipirika aãuini.

<sup>21</sup> Namariteni, nota tirketakini, !hïteosonetapiri Teoso minakatiua. Ameã.

**Teoso sãkire ameneri**  
**New Testament in Apurinã (BR:apu:Apurinã)**

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

**Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apurinã

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

